

Era la regenza recumonda da refusar la «No-Billag»

La regenza respunda a la dumonda parlamentara da deputà Peter Peyer (ps Trin)

DA MARTIN CABALZAR


■ Per regla na s'exprima la regenza grischuna betg davart projects naziunals, u mo lu sch'il Grischun è spezialmain pertutgà. Sco quai che la regenza constatescha è il Grischun sco sulet chantun triling da la Svizra dentant pertutgà «a moda zunt particulara» da l'iniziativa «No-Billag». Tant en sia comunicaziun da pressa dals 21 da december sco en la resposta a la dumonda parlamentara da deputà Peter Peyer (ps Trin) ha la regenza perquai constatà explicitamain ed en corpore ch'ella recumondia da refusar l'iniziativa «No-Billag». En sia intervenziun parlamentara sustegnida da 69 deputadas e deputads ha fatg valair Peyer ses arguments che pledan per refusar l'iniziativa e vuli savair da la regenza sch'ella sustegnna la conclusiun che l'iniziativa haja consequenzas nuschaivlas per il Grischun. Plinavant han ils interpellants vuli savair tge che la regenza quintia interprender per sensibilisar la populaziun grischuna per questa tematica en vista a la votaziun dals 3 da mars.

Midada da la Constituziun svizra

L'iniziativa vul scumandar da dastgar incassar sin plaun federal taxas da recepziun per radio e televisiun. Empè da quai duaja la confederaziun vender concessiuns da radio e televisiun a l'ingiant. Plinavant vul l'iniziativa stritgar la stipulaziun costituziunala da fin ussa che sa cloma: «Il radio e la televisiun contribueschan a la furmaziun ed al svilup cultural, a la furmaziun libra da l'opiniun sco al divertiment. Els resguardan las atgnadads dal pajais ed ils basegns dals chantuns. Els represchantan ils eveniments a moda correcta e reflecteschan adequatamain la diversitad da las opiniuns».

Consequenzas rigurusas per il Grischun

Ils interpellants èn da l'avis che questa iniziativa haja consequenzas rigurusas per il Grischun. Nunpussai da mantegnair na fiss betg mo la purschida da radio e televisiun actuala per las minoritads rumantschas e talianas, pertutgads fissan er ils emetturs da radio e televisiun dad SRF che vegnan duvrads stediain in il Grischun, sco er Radio Südostschweiz e TV Südostschweiz. Era per ils standards da qualitat, d'indipendenza publicistica



Survista dals emetturs da radio e televisiun publics e privats da la Svizra.

MAD

e da diversitad d'opiniuns e da cultura che vegnan resguardads ozendi sco chaussas natirals avess l'acceptaziun da l'iniziativa tenor ils interpellants consequenzas negativas catastrofalas. Tras il scumond d'incassar taxas e tras la vendita da las concessiuns a l'ingiant smantschia ina commercialisaziun cumplaina da la purschida da radio e televisiun. Ultra da quai purtassia l'iniziativa sut il stritg nagins respargns per ils consuments, mabain in augment dals pretschs, damai ch'els stuessan cumprar la purschida da radio e televisiun da purschiders privats cumplainamain commercials che n'è betg sutmess a principis democratics.

Ina purschida solida da meds electronics

Sco quai che la regenza constatescha dispona il Grischun oz d'ina purschida solida en il sector da las medias electronics. Quella include tant programs da la SSR en tut las trais linguas chantunales (RTR, RSI ed SRF) sco ils emetturs privats da Radio Südostschweiz e TV Südostschweiz. Questa purschida multifara garrantescha rapports audiovisuels adequats

ed ina diversitad da las funtaunas ed il sector dal schurnalissim d'infurmaziun sin plaun local, regional e chantunal. Quai saja ina premissa indispensabla per la furmaziun da l'opiniun democratica.

Gist il Grischun cun sia diversitad linguistica, culturala, politica ed economica saja ina cuntrada da medias intacta da fitg gronda impurtanza, punctuescha la regenza. Las medias duajan accompagnar, reflectar, ordinar e commentar las sfidas cuminaivlas. Sche l'iniziativa «No-Billag» vegniss acceptada fissan ils rapports regional da radio e da televisiun eliminads entaifer curt temp praticamain dal tutfatg e quai en tut las trais regions linguisticas dal Grischun, è la regenza persuadida. Quai pertutgass tant RSO, TSO, Radio SRF 1, 2 cultura, 3, 4 «Musikwelle») e.u.v, SRF 1,2 ed info, e las televisiuns RSI Rete Uno, Rete Due, Rete Tre, La 1, La 2 sco er betg l'ultim las emisiuns dal Radio Rumantsch e da la Televisiun Rumantscha.

Imaginaziuns nunrealisticas

La regenza è da l'avis che l'imaginaziun dals iniziants ch'ina purschida quantitativamain e qualitativamain sumeglianta

sa laschia refinanziar al martgà saja absolutamain nunrealistica en chantuns muntagnards e rurals da la Svizra e cunzunt en il chantun triling Grischun. Tenor la regenza èn las medias publicas ina pitga indispensabla ed a medem temp in'acquisiziun preziosa ch'è vegnida sviluppada vinavant durant decennis per ina democrazia cun instruments democratics directs bain sviluppads. Cun l'iniziativa vegnian eliminadas las medias publicas. La Svizra fissi uschia l'emprim e l'unic pajais en l'Europa democratica che scumandass a sasezza da sustegnair uffizialmain medias publicas.

Promoziun da lingua e cultura

L'infurmaziun da las medias publicas da la Svizra cumpiglia ultra da l'infurmaziun er ulteriurs secturs, sco la furmaziun, l'integraziun, la promoziun da la coesiun sco er il divertiment. Ina rolla impurtanta goga plinavant l'incumbensa en il sector da la cultura, accentuescha la regenza. En la cuntrada mediala dal Grischun gidia en spezial RTR dapi passa 90 onns a mantegnair e promover la ritgezza culturala da noss chantun. Mo gia las 11 000 registraziuns da musica in-

digena che sa chattan en ils archivs dad RTR e che creschan ad in crescer e ch'ins po tadlar regularmain furman in vair stgazi da la cultura grischuna. Grazia a la cunvegna da branscha «Pacte de l'audiovisuel» èsi pussaivel da coproducir mintg'onn tschintg fin sis films cun la cinematografia indigena.

Il status spezial dad RTR

Il cass spezial dad RTR ha ultra da quai ina dimensiun impurtanta per la politica da linguas. Ultra da la scola èn RTR (e dal reminent era la pressa rumantscha red.!) in dals motors il pli ferm per la lingua rumantscha. Cun purschidas per tut las gruppas da vegliadetgna, en spezial er per uffants, cun programs en tut ils idioms e da tuttas variantas dialectalas n'è RTR betg mo il center dal mintgadi da la Rumantschia, mabain er in actur impurtant en connex cun la promoziun da la chapientscha interrumscha. Ultra da quai èn SRG, RSO e TSO lieus da scolaziun per in grond dumber da schurnalists dal Grischun.

Percepziun dal Grischun anovers ed impurtant factor economic

Grazia al schurnal regional da Radio SRF, al biro regional dad SEF-TV, al team da correspondentas e corrispondents dad RSI a Cuir sco er dad RTR cun programs quotidiani en spezial sin SRF vegnan temas grischuns adina puspè recepids en tut la Svizra. Pervia da la tecnologia da diffusiun digitala èsi plinavant er pussaivel da retschaiver Radio Südostschweiz e TV Südostschweiz en tut la Svizra.

Da las entradas da las taxas vegnan mintg'onn var 32 milliuns en il Grischun. Da quels survegnan Radio e TV Südostschweiz (ca. 63 posts da lavur) var set milliuns e las purschidas dad SRF, dad RSO e dad RTR (ca 180 posts da lavur) var 25 milliuns. Il service public media da la SRG e dals emetturs concessiunà da privats procura pia ch'ina part considerabla da las taxas va puspè enavos a l'economia sivzra, resp. grischuna. Era sche l'intent turistic na tutga betg directamain tar l'incarica da prestaziun dad emetturs concessiunads dal Grischun profitan las destinaziuns turisticas dal Grischun sco er il mastergn adina puspè da l'effect collateral, constatescha la regenza. Maletgs da noss chantun chattan regularmain la via sin visurs en tut la Svizra.